

di ganzante d'oro, con le cerimonie ducal et li oratori imperador, Franza, Anglia, Milan et Ferrara, il primocerio di San Marco, lo episcopo di Nicosia Podocataro, lo episcopo di Baffo Pexaro, et lo episcopo di Veia; procuratori, sier Lorenzo Justinian, sier Piero Marzello, sier Carlo Morexini et sier Marco da Molin, et do cavalieri Hierosolimitani, el prior de San Zuane dal Tempio et il cavalier di Garzoni . . . in Cipro. Portò la spada sier Francesco Morexini, va podestà a Brexa, in damaschin cremexin, fo suo compagno sier Domenego Trivixan fo avogador, in veludo cremexin; et oltra di Censori, 42 di officii de Rialto et San Marco, tra li qual sier Hetor Loredan executor sora le aque. Et venèno in chiezia a vesporo; et in tal zorno Sua Serenità va sul pergolo, ma non andoe, come fè *etiam* el dì di S. Marco, per esser grasso; et stete in coro in la sua sedia.

El hessendo venute, avanti Soa Serenità andasse in chiezia, *lettere da Costantinopoli, di l'orator et vicebailo nostro sier Piero Zen, di 27 marzo, tenute fin 28, parte in zifra*, fo leto parte come haverà 100 galie; il resto indusiato a lezerle da poi vesporo; siché compito vesporo, il Collegio di la Signoria col Serenissimo si reduseno a lezerle. *Etiam* li Savi parte se reduseno. Il summario dirò più avanti. Et *da Milan, di l'orator, di 6*.

In questa matina, partiteno de quì sier Anzolo Gabriel, sier Hironimo da chà da Pexaro et sier Alvise Badoer avogadori straordinari, et andono a Padoa per compir mexi 4 nel suo sindacato.

Noto. Fo dito heri, che certo de merceanzie cargo galion di Ancona, havendo cargà a la Valona per Levante con robe de gran valuta, lassato i mercanti in terra, el patron et marinari erano partiti soli.

A dì 9, zuoba, fo il zorno di la Sensa. El Serenissimo vestito d'oro con manto de raso paonazo, et il bavaro de armelini et la bareta de ganzante d'oro et rosso, con li oratori sopraditi, et di più el primocerio di S. Marco, lo episcopo di Nicosia Podocataro, lo episcopo di Baffo Pexaro, el prior di S. Zuane dil Tempio Michiel, et li ordenari è invadati al pranzo per li officii, andono in buciatoro a sposar el mar et a messa a San Nicolò de Lio, et era solito el Patriarca in tal zorno venir in la soa piata con li canonici et dir messa a San Nicolò, el qual mandava do confetiere di ruose in buciatoro. Et per esser questo nostro Patriarca anlato a Roma senza licentia del Dominio, el fece l'officio lo episcopo di Vegia dalmatino, et a S. Nicolò disse

la messa el prior, per esser l'abate andà a capitulo a S. Beneto. Et tornati, si andono al pranzo tutti, iusta el solito. Nè questa matina fo letera alcuna, se non :

Da Costantinopoli, dil Zen orator et vicebailo, di 11 april, qual fo leto poi el pranzo perchè erano in zifra, et par siano contrarie di le prime, tutta via continua l'armata et exercito.

Di sier Francesco Pasqualigo proveditor di l'armada dal Sasno, di 25 april. Il summario dirò poi.

Noto. El duca de Urbin, con suo zenero don Antonio de Montealto, in questa matina andono in barca a Lio a veder el buciatoro.

El duca di Ferara anche. Et uno suo bregantin vuoga remi . . . vogava col buciatoro.

Da poi disnar, li Savi se reduseno a consultar, in materia de danari et scriver a Ratisbona.

A dì 10. La matina, vene in Collegio il signor 62* duca de Urbin capitano zeneral nostro, familiarmente, et quivi fè un discorso bellissimo; venendo il Turco in Italia, et l'opinion sua voria haver 10 milia lanzinech, 10 milia spagnoli, 10 milia italiani et starli a l'impeto con l'armata se haverà fuora; et disse, in tuta Italia non se troveria 10 milia fanti. Con altre parole, che fo molto laudato dal Colegio.

Vene l'orator de l'imperator, per saper di novo di le lettere di Costantinopoli. Il Serenissimo li disse et sollicitò la risposta a la lettera dil conte Piero.

Fo ballotà el mandato per expedir sier Zuan Moro electo proveditor zeneral a Corfù. Ballotà do volte, non fu preso.

Da poi disnar, fo Pregadi, et fo leto assà lettere per tre secretari che le lexeno.

Di sier Gasparo Contarini patron a l'Arsenal, da Pinguento di 27 april. Come ha mandà a l'Arsenal remi 1678, et carga uno burchio con remi 1190, fatti per lui et per altri numero 1513, et vol licentia de poter venir a repatriar.

Di Verona, di sier Lumardo Justinian capitano, di 4 mazo. Lauda il conte Lodovico di Sambonifacio, qual havia el cargo de andar con guastadori in aiuto di prender la rota di la Sacheta, inteso che si fa colateral, ha voluto venir in questa terra, et lo lauda assai; et mandato in loco suo domino . . . Dal Ben.

Di Crema, di sier Antonio Badoer podestà et capitano. Zerca li privilegi di l'abazia di Zeredo, risponde et manda in nota, et saria bon se facesse i soi formenti fosse portati in la terra, *ut in litteris*.